



PROFETA sira



Liafuan tetun “profeta” traduz liafuan hebraiku ida “nabi” ne’ebé temi dala 315 iha livru sira Antigu Testamentu nian. Biblista ladún hatene liafuan ida ne’e mai husi ne’ebé, maibé sira hanoin katak nia mai husi liafuan “nabû” katak “bolu, temi ema nia naran”. Husi ne’e mosu signifikadu kona-ba profeta: profeta mak ema ida ne’ebé simu bolun, tan ne’e nia mós bolu, nia ko’alia; nia mak ema ne’ebé simu vokasaun partikular ida husi Maromak. Sira mai husi fatin oinoin: balun husi Judeia, balun husi Norte, maibé sira hotu simu bolun ida husi Maromak no sira hatán ba bolun ida ne’e tuir ida-idak nia karakter ka ninia esperiênsia.

Livru hotu profeta sira nian iha karakteristikada: maski informasaun kona-ba profeta nia moris dala barak ladún kompletu, maibé la falta profeta ida-idak nia vokasaun. Isaías, Jeremias no Ezekiel haktuir sira-nia vokasaun ho estilu solene, hodi hakerek partikular barak, balun hato’o sira-nia bolun liuhusi simbolu ruma, dala ruma sira hato’o sira nia vokasaun durante diálogo ida; buat ne’ebé liga sira hotu katak vokasaun ne’e mak Maromak nia inisiativa, sira rasik la hili atu tuir dalan ida ne’e.

Loloos liafuan “nabi” iha signifikadu rua tan: ida mak majiku, ida fali dehan “ema ne’ebé iha visaun sira” (kf Amos, Zakarias, Ezekiel...), Maromak mosu ba profeta liuhusi “mehi” ida ne’ebé ko’alia kona-ba buat ne’ebé mosu ona ka sei mosu hodi halo profeta komprende istória nia signifikadu.

Bainbain ema temi profeta nu’udar “Maromak nia emar”: Bib*lia uza liafuan ida ne’e dala 29 bainhira ko’alia kona-ba Eliseu, dala 7 kona-ba Elias, maibé uza mós ba Moisés no Samuel. Liafuan ida ne’e evidesia relasaun metin ne’ebé Maromak iha ho profeta; relasaun ne’ebé mosu ho klaru iha profeta nia liafuan sira no iha hahalok ne’ebé sira hatudu.

Iha 18 livru ne’ebé ko’alia kona-ba moris no lia menon husi Profeta sira. Livru sira ne’e mak:
Isáias, Jeremias, Lamentações,
Baruc, Ezequiel, Daniel, Oseias,
Joel, Amós, Abdias, Jonas,
Miqueias, Naum, Habacuc,
Sofonias, Ageu, Zacarias,
Malaquias.



Profeta sira nia knaar

Bainhira povu Israel moris ona iha rai ne’ebé Maromak promete, nia tenke nafatin kuidadu ba povu sira ne’ebé haleu nia. Povu sira seluk reprezenta perigu husi liur: sira iha kbiit, iha sira-nia maromak sira, iha sira-nia kreensa. Maibé mós perigu mosu husi laran: povu Israel ne’ebé hetan ona fatin estabil ida, bele haluha Maromak, ninia domin ba Na’i sai malirin, sira hahú hanoin ba sira-nia an, sai bokur, tuir idolu sira no hanehan ema kiak sira. Se iha rai-fuik maran sira bele hetan esperansa, iha situasaun foun ida ne’e, hebreu sira bele lakon domin ba Na’i. Ho situasaun hanesan ne’e, profeta sira nia knaar mak hafanu povu tomak, fô hanoin Maromak loos mak ida ne’ebé. Sira iha responsabilidade atu rona Maromak nia Futar Lia no hato’o liafuan hirak ne’e ba

povu. Sira mós hakilar hasoru injustisa sosiál. Foufoun ira hahú nu'udar grupu: besik Samuel iha profeta sira nia comunidade ida (kf 1Sam 19,18-24), maibé neineik, sira hahú hala'o sira-nia knaar mesak hanesan Elias (1Liurai 18 – 2Liurai 1).

Ho sira-nia liafuan, profeta sira koko atu haroman situasaun sira ho Maromak nia liafuan, sira interpreta realidade tuir Maromak nia projetu salvasaun nian.

Kriteriu atu hatene se profeta ida mak loos ka la'e



Maibé oinsá hatene se profeta nia liafuan sira mai husi Maromak ka profeta rasik hanoin hanesan ne'e?

Biblia rasik apresenta kriteriu ruma atu hatene se profeta nia liafuan sira mak loos ka la'e. uluknanain iha kriteriu esternu ida, ne'ebé livru Deuteronomiu nian esplika: profesia ida mak loos se ita bele haree ninia realizasaun, katak se ema ida dehan liafuan ida, maibé iha realidade mosu buat seluk, sai susar ba ema seluk fiar nia. Maibé dala ruma bele akontese katak profeta ko'alia kona-ba akontesimentu ruma ne'ebé sei mosu depois de tinan ruma ka barak. Se nune'e, susar atu aplika kriteriu ida ne'e tanba ema la iha possibilidade atu avalia kedas se liafuan sira ne'e loos ka lae (Kf Dt 18,21-22)

Kriteriu ida tan katak profeta hatudu fidelidade ba tradisaun. Bele hetan kriteriu ida ne'e iha Deuteronomiu (Dt 13,2-4). La to'o katak liafuan ne'ebé profeta dehan tenke realiza, maibé liafuan hirak ne'e tenke tuir mós hanorin tradisionál. Iha istória Israel ita haree katak sira la moris ho "teoria", maibé buat hotu sai pratika kedas, nune'e loloos profeta sira tenke haklaken buat ruma ne'ebé la'o ho buat ne'ebé povu toman ona. Maibé kriteriu ida ne'e la bele aplika beibeik: sei ita konsidera profeta Jeremias nia esperiênsia, bele haree katak nia ko'alia hasoru Templu no sirkunzisaun no dala ruma parese katak nia hasoru mós *Torah*: buat ida ne'e susar liu ba povu Israel atu simu.

Iha kriteriu esternu ida tan, ne'ebé profeta Jeremias rasik espresa: "Profeta sira ne'ebé uluk liu mai ha'u no uluk liu ba ó, sira haklaken ba nasaun barak no ba reinu kbiit wa'in sira funu, hamlaha no moras. Maibé, profeta ne'ebé haklaken rahun di'ak be sei mai, ema bele hatene loloos nia hanesan Na'i nia manu-ain loos, wainhira buat sira ne'ebé nia haklaken mosu tiha ona" (Jer 28,8-9). Bele hanaran kriteriu ida ne'e, "kriteriu probabilidade", katak fasil liu atu hetan profesia loos bainhira ko'alia kona-ba susar no terus ne'ebé povu sei hasoru, duke hetan profesia loos ida ne'ebé ko'alia kona-ba damen. Se ita lee profeta Amos, Oseias, Isaías, Miquea... maski sira iha liafuan barak atu konsola no fó esperansa ba sira-nia povu, dala barak bele hetan mós liafuan kastigu nian.

Kriteriu 3 ne'e mak interesante, maibé la to'o atu komprende se profeta ko'alia lialoos ka lae.

Oras ne'e ta konsidera kriteriu tolu ne'ebé se la iha, la bele fiar ba profeta nia liafuan sira:

1. VOKASAUN: profeta sira apresenta modelu la hanesan, maibé hotuhotu rona Maromak nia bolun. Iha modelu 4 vokasaun nian:

- a. estilu militár: bolun hanesan bainhira ema boot ida manda soldadu simples ida. Bele lee esperiênsia ida ne'e iha Amos (Am 7,14-15), Oseias (Os 1,2), Jonas (Jo 1,1-3; 3,1-3).

- b. Estilu na'in-atan: bainbain, sira ne'ebé simu bolun, la koho tuir no apresenta sira-nia susar atu hala'o vokasaun ida ne'e; reasaun ida ne'e normál bainhira ema ida komprende distánsia entre ninia kapasidade no misaun ne'ebé Na'i entrega iha ninia liman. Bele lee esperiénsia ida ne'e iha Moisés no Gideon (maski sira na'in rua la'ós profeta), Jeremias (Jer 14-10) no Ezekiel (Ez 2,1-10: iha ne'e Ezekiel la ko'alia, maibé husi buat ne'ebé Maromak dehan ita komprende katak nia "rebelde").
 - c. Estilu liurai-konselleiru: modelu ida ne'e hanoin ba relasaun entre liurai ida no ninia Konsellu ne'ebé hala'o nasaun sira. Profeta Miquea (1 Liurai 22,19-22) no Isaias (kap.6) hato'o sira-nia esperiénsia iha ne'ebé Maromak hanesan liurai ida, anju sira hanesan ninia konsellu no profeta simu knaar husi nia.
 - d. Estilu mestre-eskolante: profeta komprende ninia vokasaun liuhusi ema ida ne'ebé halo dixernimentu. Ida ne'e mak Eli no Samuel nia esperiénsia (1sam 3) no Elias hamutuk ho Eliseu (1Liurai 19). Ho prosesu ida ne'e, dala ruma bele hetan susar atu komprende, maibé neineik, Maromak hatudu ninia planu.
2. LAHO INTERESE: profeta halo buat hotu hodi la buka ninia interese pesoál, hanesan profeta Miquea hakerek (3,5). Profeta mak ema ida ne'ebé ba hasoru ema seluk hodi la ta'uk atu ko'alia kontra buat ne'ebé sira hakarak. Tan ne'e, dala barak profeta hetan terus boot tanba ema hafunu nia no buat ne'ebé nia dehan, no ida ne'e sai kriteriu katak ninia liafuan mai husi Maromak duni!
 3. KOERÉNSIA MORIS NIAN: profeta nia moris mak koerente ho buat ne'ebé nia haklaken. De fatu, iha Biblia, dala barak ita bele lee diskursu kontra falsu profeta ne'ebé haklaken buat ruma ne'ebé sira rasik la moris tuir. (kf Is 28,7). Maibé, maski nune'e, dala ruma profeta nia hahalok hakarak sadik ema sira ne'ebé rona nia, hodi halo sira refleto kona-ba Maromak nia hahalok (kf profeta Oseias no nia esperiénsia domin nian).

ESTRUTURA NO KOMPOZISAUN

Livru profetiku dahuluk sira hahú ho profeta Amos iha sekulu VIII nia laran. Bele fahe ba faze 3:

1. FAZE ORÁL: katak profeta ko'alia bainhira iha eventu ruma. Dala ruma susar atu hatene tuir loloos profeta nia diskursu hakarak ko'alia kona-ba saida, tan ne'e biblista sira koko atu komprende bainhira mak profeta ko'alia.
2. FAZE HAKEREK DAHULUK nian: dala ruma, profeta rasik ka ninia eskolante sira hakerek buat ne'ebé profeta dehan atu bele lee fali ba ema importante ida (liurai, ka funsionariu ida). Se lae, liu tiha tempu badak ida, ema ne'ebé rona profeta nia liafuan hakerek buat ne'ebé sira hanoin hetan.
3. FAZE REDASIONÁL: iha momentu ida ne'e, ema ida, ka grupu ida tau hamutuk testu oinoin ne'ebé iha no halo livru. Ita bele haree oinsá profeta nia liafuan sira liu tempu naruk, nafatin sei moris no ida ne'e sai testimoni katak la'ós ema ida nia liafuan, maibé Maromak rasik ninian.

Profeta sira nia mensajen

Ladún fasil atu halo sinteze entre profeta barak ne'e ho ida-idak nia karakteristika, maibé bele koko atu halo diskursu jerál ida.

- Profeta sira haklaken Maromak ida de'it ba povu Israel: sala boot liu ne'ebé sira haklaken mak tuir idolu. Maibé sira halo povu konxiente katak nasaun sira seluk, rikusoin, privileju mós bele sai idolu ida. Nune'e sira hatene lee istória ho matan moris, hodi aplika ba situasaun ida-idak ninia dixernimentu espirituál.
- Exodu, aliansa: liafuan hirak ne'e mak importante liu ba profeta sira, tanba sira komprende katak liafuan aliansa bele sai liafuan mamuk ne'ebé povu temi, maibé la moris tuir; katak sira hanoin atu serbí Maromak loos, maibé sira tuir idolu seluk.
- Sira mós hasoru kultu iha Templu, bainhira buat ne'e sai motivu atu moris hakmatek: ha'u oferese ona ha'u-nia sakrifisiu, ha'u la lika preokupa ona, la lika rona ha'u-nia konxiénsia! Tan ne'e, profeta oseias ko'alia hasoru buat ne'e: "Ha'u hakarak laran sadia, la'ós sakrifisiu", ne'ebé Jezús rasik temi fila fali.
- Sira kondena injustisa sosiál. Relasaun espesiál ho Maromak halo sira sai sensivel liu ba buat hotu ne'ebé mosu ba povu no la tuir Maromak nia justisa. Sira fó atensaun boot ba aspetu loron-loron nian hodi prontu atu ko'alia hasoru buat ne'ebé hanehan povu ki'ik: trata ema nu'udar atan, buka de'it rikusoin, oho ema atu manán rai. Dala barak sira nia lian hakilar maka'as kontra buat hirak ne'e.

Tuir mai, bele hetan tabela ida ho profeta sira nia naran: kona-ba profeta ruma, Biblia la fó informasaun klaru nune'e tau ?

	NARAN	TEMPU MORIS (+ ou -)	FATIN	SELUK...
Profeta Maior	Isaias	765-700 mK (liurai Ozia)	Jerusalem	Livru fahe ba parte 3 ne'ebé hakerek iha tempu diferente
	Jeremias	650-609 mK (ho Nabukodonosor)	Jerusalem	Nia hakerek iha tempu ne'ebé susar tebes ba povu Israel
	Lamentações	587-586 mK	Jerusalem	Tradisaun hateten katak Jeremias mak livru ida ne'e nia autór
	Ezekiel	593-571 mK	Babilonia	Nia uza ilas oioin, visaun no mehi
	Daniel	600 mK, maibé hakerek iha tinan 200 mK	Babilonia	Fahe ba parte 2: akontesimentu sira no visaun sira
	Baruk	Hanesan Lamentações	Babilonia/Jerusalem	La iha iha Biblia hebreu sira nian. Karik Jeremias nia "sekretáriu"
Profeta Menor	Oseias	Hanesan Amós	Reinu Norte nian	Nia istória pesoál mak aiknanoik ida
	Joel	400 mK (depois de eziliu)	Jerusalem	
	Amós	750-740 mK	Samaria/ Betel	Husi Judeia ba haklaken iha Reinu Norte
	Abdias	587 mK?	Judeia	Livru badak liu: versikulu 21
	Jonas	450 mK?	Ninive	La'ós profêsia maibé istória ida
	Miqueias	765-700 mK	Reinu Norte nian	
	Naum	612 mK	Reinu de Judas	
	Habacuc	609-597 mK	?	Livru ki'ik: parese uza ba liturjia
	Sofonias	640-609 mK (ho liurai Josia)	Jerusalem	
	Ageu	520 mK	Jerusalem	Durante restaurasaun Templu nian
	Zakarias	520-515 mK	Jerusalem	
	Malaquias	515-445 mK	Jerusalem	Karik tuir inspirasaun Neemia nian